

اساں نہ دے کھلو و ہائیں

کچھ دنہہ پہلے میں تھرڈ ایئر پنجابی دا پیریڈ پڑھا کے اپنے شعبے آلے کمرے اچ آ کے بیٹھا ای ہاموں جوں اوتوں او سے جماعت دا ہک چھوہر اندر آیا۔ سلاماں لیکری کر کے میرے نیڑے آ کے کھلو گیا تے اپنے بے اچ ہتھ مارن لگ پیا۔ اوس کر ماں آلے پنجابی دی کتاب کڈھی تے مینوں آہداے۔ ”سر آہے کتاب میں تہاڈی ایس الماری اچ رکھ چھڈاں“ میں آکھیا رکھ چھڈ ایہہ کائی گھس دی پئی اے۔ اوہ آہداے میں صرف اچ نہیں بلکہ نت اتھائیں رکھنی ایں۔ پچھیا خیر تاں ہے ایہہ ایڈی وزنی تاں نہیں جوں تیتھوں چمدی نہیں پئی۔ اوہ اگوں نما نا جیہا منہ کر کے آہداے گھر لے جاواں تاں وڈا بھرا مریندا اے۔ اوہدی ایہہ گل او پری جئی لگی۔ پچھیا اوہنوں ایس کتاب نال کیہا دکھ کر اے؟ چھوہر آہداے میرا بھرا مینوں پنجابی ناہی رکھن دیندا۔ اوہ آہداہائی پنجابی تاں فضول جیہا مضمون ایں، ایہدے پڑھن نال نہ نوکری لہدی اے تے نہ کوئی ہور فیدا اے۔ اوہ چاہندا ہائی جوں جغرافیہ تے اکناکس رکھاں پر میں اوس توں چوری پنجابی رکھئی اے۔ جے کتاب گھر لے گیوم تاں بھرا نوں پتہ لگ ویسیں تے اوس میری چنگی تونی (پھینٹی) لاؤنی ایں۔

میں پچھیا مڑ توئیں بھرا توں ودھ کے کیہ سوچ کے پنجابی رکھی اے؟ آہداے سر پنجابی ساڈی اپنی زبان ہوئی۔ اسیں وی ایہنوں نہ پڑھیے تاں انگریزاں آ کے پڑھنی ایں۔ نوکری لگے تے بھاریں دو جہانی نہ لگے میں تاں رکھئی اے۔ چھوہر دی گل سن کے روح بھیڑا ہو گیا۔ اوہ نرا کوڑا ای ناہ۔ اپنے دلہیں دے پردھاناں دے پنجابی زبان نال کیہتے ہوئے دھروہ دسدے پئے ہان۔
میرا پیار بھلا یا ای چن ڈھولا ☆ تینوں آکھاں وی تے کیہ آکھاں۔

مکی تاں حد کھلی اے بھئی خیر پختون خواہ اچ چار مادری زبانان پشتو، ہندکو، کھوار تے سرائیکی اچوں ہک زبان داہویں تاں لازمی پڑھنی پمدی اے۔ سندھ اچ سندھی تے بلوچستان اچ بلوچی وی میٹرک تاں فرض اے پر ایڈا ظلم خدا دا بھئی پنجاب اچ پنجابی فرض سنت تاں پروں دی گل اے، نفلاں آلے کھاتے اچ ای کائی نہ ہوئی۔ ہورتاں ہور سکولاں آلے پاسیوں ایم اے پنجابی دی انکریمنٹ وی بند کر چھڈی پئے۔ اللہ دی بلاں مگر ہوسنے پر اوس چھوہر دی گل دے اکھانوں اسانوں بھاریں گھنیاں کساں وی لگدیاں رہیاں پر پنجابی دا لڑاساں وی نہیں چھڈناں۔ جٹ دی ڈبک وانگ اسیں ضد دے بہوں چیرھے ہائیں۔ ساڈے پردھاناں نوں ہک دیہاڑے ساڈی ماں بولی نوں ایہد اتق دیوناں پوناں ایں۔ پتہ انہا نوں وی ڈاڈھا ہے جوں ایہہ نہ دے کھلو و ہائیں۔

☆☆☆